

# Universiteit Stellenbosch

## Prosedure om Konvokasielede te nomineer, te verkies en aan te wys om in die Raad en die Institusionele Forum te dien

In die geval van inkonsekwentheid tussen verskillende weergawes van hierdie prosedure, geld die Engelse weergawe.

### 1. Toepassing en omvang

- 1.1. Die Konvokasie moet hierdie proses volg om lede te nomineer, te verkies en aan te wys om in die Raad en die Institusionele Forum te dien.<sup>1</sup>
- 1.2. Die Konvokasie moet kandidate benoem om in die Raad<sup>2</sup> en die Institusionele Forum<sup>3</sup> te dien.
- 1.3. Slegs lede van die Konvokasie mag deelneem aan en kwalifiseer vir nominasie, verkiesing en aanwysing tot die Raad en die Institusionele Forum.
- 1.4. Volg hierdie proses:
  - 1.4.1. om die lede te nomineer en te verkies om in die Raad en die Institusionele Forum (afhangende van watter een relevant is) te dien;
  - 1.4.2. ongeag daarvan of die nominasie en verkiesing van die lid/lede plaasvind voor of na die lid/lede se huidige ampstermyn verstryk.

### 2. Kennisgewing van verkiesing en versoek vir nominasies

- 2.1. Die Sekretaris van die Konvokasie moet die Registrateur skriftelik in kennis stel van 'n vakante posisie in die Raad of Institusionele Forum wat op hande is voordat die termyn van die lid verstryk of so gou as moontlik nadat 'n ongeskeduleerde vakante posisie ontstaan. Indien die Sekretaris versuim om die Registrateur binne 'n redelike tyd in kennis te stel, mag die Registrateur binne sy of haar bevoegdheid optree en met die prosedure voortgaan.
- 2.2. Die Kantoor van die Registrateur sal elektronies 'n versoek vir nominasies aan die lede van die Konvokasie uitstuur om geskikte kandidate te nomineer.
- 2.3. Die Kantoor van die Registrateur moet die elektroniese versoek vir nominasies binne 'n redelike tydperk uitstuur voor of wanneer die termyn van die lid wat op hierdie liggame dien, verstryk, of wanneer 'n ongeskeduleerde vakante posisie ontstaan.

### 3. Nominasies en veldtogvoering

- 3.1. Nominasies sal vir 30 kalenderdae nadat die lede elektronies in kennis gestel is, oop wees.
- 3.2. Lede moet nominasies aan konvokasie@sun.ac.za stuur of nominasies elektronies via die aangewese portaal indien. Lede moet nominasies op die voorgeskrewe vorm indien.
- 3.3. 'n Lid kan deur een voorsteller vir verkiesing genomineer word. Vier ander lede moet die

---

<sup>1</sup> Institusionele Statuut van die Universiteit Stellenbosch Hoofstuk 4 Artikel 49 (1)

<sup>2</sup> Institusionele Statuut van die Universiteit Stellenbosch Hoofstuk 2 Artikel 6 (k)

<sup>3</sup> Institusionele Statuut van die Universiteit Stellenbosch Hoofstuk 2 Artikel 29 (2)(d)

nominasie sekondeer.

- 3.4. Niemand mag 'n nominasievorm meer as een keer onderteken nie, hetsy die persoon 'n nominasie voorstel of sekondeer. Dit beteken dat dieselfde persoon nie 'n voorsteller en terselfdertyd 'n sekondant vir dieselfde nominasie mag wees nie. Dit is ook van toepassing op die persoon wat genomineer word. Sodanige persoon mag nie sy of haar eie nominasie as voorsteller of sekondant onderteken nie.
- 3.5. 'n Genomineerde lid moet (op die versoek van die voorsteller) die nominasie elektronies in die voorgeskrewe formaat aanvaar. 'n Genomineerde lid moet 'n visiestelling insluit en enige ander vereistes, soos aangedui in die versoek vir nominasies en/of die nominasievorm, in sy of haar aanvaarding nakom.
- 3.6. 'n Lid sou vir meer as een vakante posisie in die Raad of Institusionele Forum, soos van toepassing, genomineer kon word.
- 3.7. Die lid kan slegs in een posisie aangewys word. 'n Lid van die Konvokasie sal in die posisie waarvoor hy of sy die meeste stemme as die suksesvolle kandidaat verwerf het, aangewys word.
- 3.8. Sodra 'n lid aangewys is, verval alle verdere nominasies vir sodanige lid.
- 3.9. Na die nominasietydperk van 30 kalenderdae verby is, sal die Registrateur, of sy of haar gevolmagtigde(s), kontroleer dat die nominasies en die deelnemende lede geldig is. Nominasies deur nie-lede, of nominasies wat nie hierdie prosedure of vereistes nakom nie, is ongeldig.
- 3.10. Indien die Registrateur slegs een geldige nominasie per vakante posisie ontvang, sal daar nie 'n verkiesing plaasvind nie. In sodanige geval sal die benoemde in die Raad of die Institusionele Forum, soos van toepassing, aangewys word. Die Registrateur sal die Konvokasie hiervan in kennis stel.
- 3.11. Indien daar meer geldige nominasies as vakante posisies is, sal die Registrateur 'n elektroniese skakel aan lede verskaf om te stem. Alle verkiesings sal elektronies uitgevoer word.
- 3.12. Genomineerde lede mag veldtogte deur hulle persoonlike sosialemediarekeninge voer nadat die nominasies bekend gemaak is, en tydens die verkiesings tot die verkiesings afgehandel is. Kandidate wat die US se logo, handelsmerk, databasis of adreslys gebruik, sal as kandidate gediskwalifiseer word.

#### **4. Stemming**

- 4.1. Stemming sal op 'n aanlyn platform geskied.
- 4.2. Lede het tien (10) kalenderdae om hulle stemme eenmalig in digitale vorm uit te bring.
- 4.3. Lede kan vir een kandidaat per vakante posisie aanlyn stem.
- 4.4. Niemand mag namens 'n ander lid stem nie.
- 4.5. Deur aanlyn te stem, neem die lid die verantwoordelikheid op hom- of haarself vir nakoming van die verkiesingreëls. Oortreding van die reëls kom op bedrog neer en is 'n kriminele oortreding. Die Interne Oudit-funksie kan alle sake waar bedrog vermoed word, ondersoek, en dit kan tot kriminele vervolging lei.

## **5. Bekendmaking**

- 5.1. Die lid wat die meeste stemme vir die posisie waarvoor hy of sy verkiesbaar was, verwerf, sal as die suksesvolle kandidaat beskou word en in die betrokke posisie aangewys word.
- 5.2. Die Registrateur sal lede aangewys in die Raad of die Institusionele Forum, soos van toepassing, bekendmaak.
- 5.3. Na afloop van die verkiesing, sal die Registrateur die suksesvolle kandidaat/kandidate in kennis stel dat hy/sy/hulle in die Raad of Institusionele Forum, soos van toepassing, aangewys is, en die suksesvolle kandidaat/kandidate se aanwysing aan die Konvokasie bekend maak.
- 5.4. Die Registrateur sal onsuksesvolle kandidate binne 'n redelike tyd in kennis stel.

UKR goedgekeur 24 Mei 2021